

Ito, Eddie y 'Butishi di Alegria' a ricibi Premio di Cultura Prins Bernhard

ORANJESTAD - Durante un ceremonia special na Museo Historico, Gobernador Refunjol a haci entrega di e prestigioso premio di Prins Bernhard Cultuurfonds na Ito Tromp y Edie Tromp pa 40 aña di dedicacion continuo trahando e programa cultural "Butishi di Alegria" cual tabata resona tur diadomingo na Radio Kelkboom. Esaki a sosode den presencia di presidente Winthrop Curiel di Prins Bernhard Cultuurfonds, miembronan di Aruba, Alice van Romondt, Des Croes, Urbano Maduro, Roly Sint Jago, Edsel Lopez y Frensel Giel.

Dos aña pasa na celebracion di 50 aña di existencia di Prins Bernhard Cultuurfonds a introduci e premio bi-anual aki riba cada isla. Pa Aruba esaki ta e di dos bes cu a haci entrega, e prome biaha e artista renombra Glenda Heyliger a risibi e premio aki pa su logronan artistico riba tereno local y internacional.

Awor cu hopi orguyo y satisfaccion di tur miembro di PBCF Ito Tromp y Eddy Tromp a ricibi e premio pa nan 40 aña di dedicacion na cultura y musica di Antiya y Aruba, pa e uso di papiamento den forma corecto durante nan programa "Butishi di Alegria", pa e aprecio y respet cu nan a crea pa tur local ta di nos, pa e tesoro cultural y musical cu nan a conserva pa generacionnan cu ta bin, tanto aki como na Antiya.

Gobernador Refunjol a haci entrega di e obra di arte den brons traha pa e conocido sculturista Hortence Brown, hunto cu un cheque cu ta forma parti di e premio. Gobernador ta Regent di Prins Bernhard Cultuurfonds, representando Casa Real, y durante e ceremonia el a expresa su admiracion y respet pa Ito y Eddy cu durante 40 aña a sacrifica voluntariamente hopi ora di nan bida priva pa realiza un programa cultural

cu henter comunidad tabata disfruta di dje. El a felicita nan cu e reconocimiento aki, bisando cu tin bes nos ta traha na beneficio di comunidad keriendo cu e efecto di nos trabou ta keda oculta, pero den e caso di Ito y Eddy nan trabou a resalta y awe premia merecidamente.

Despues di e acto oficial a sigi un recepcion chikito pa celebra e logro aki. Danki na esnan cu tabata presente y danki pa duna Ito y Eddy Tromp atencion den medianan di comunicacion! Alice van Romondt, vice presidente di PBCF.

Inicio y Final

Na final di aña 2004, despues di 40 aña consecutivo, Ito y Eddie Tromp a pone punto final na e programa Butishi di Alegria. Cu mesun determinacion cu nan a mantene e programa pa 40 aña largo, Ito y Eddie a dicidi cu ta stop.

Butishi di Alegria a cuminsa via Radio Kelkboom na 1964 bou direccion di Eddie Tromp y Ito Tromp, kendenan por cierto, no ta ruman. Fielmente nan a keda cu Butishi y fiel tambe presentando e programa aki tur siman diadomingo pa dos ora largo. Hasta tempo cu Ito tabata studia na Puerto Rico e programa a sigui cu Ito y Eddie, tur siman tape tabata bai bin entre Aruba y Puerto



Rico. Den Butishi di Alegria Ito y Eddie ta inseparabel, Eddie ta percura tecnicamente y musicalmente pa Ito por papia culturalmente.

E balor cultural di Butishi di Alegria ta inmenso. E tabata completamente dedica na musica y cultura di Aruba y Antiyas. Practicamente tur artista di e islanan aki a pasa den e programa aki. Ito y Eddie a crea un tesoro di entrevistanan y grabacionnan bibo durante tur e añanan. Pa motibo di e dedicacion

intensivo y perseverancia pa 40 aña largo trece cultura y musica di nos islanan mas serca di pueblo, pa motibo di semper stimula bon uso di Papiamento den e programa (y esaki for di aña 1964!), pa e respet cu nan a crea serca publico en general pa aprecia local ta di nos, ta mas cu na su lugar cu Prins Bernhard Cultuurfonds Antiyas y Aruba, seccion di Aruba, ta otorga e Premio Cultural di Prins Bernhard Cultuurfonds na Eddie Tromp y Ito Tromp di Butishi di Alegria.

